



Dugang kakahas nga ipatuman ang Kahublagan Panadlong!

Isulong ang inaway banwa sa mataas nga halintang nga may bag-ong kusog!

*Pahayag sang Komiteng Rehiyunal sang Partido sa Isla sang Negros
sa ika-56th nga Anibersaryo sang New People's Army
Marso 29, 2025*

ANG KOMITENG REHIYUNAL SANG PARTIDO sa Isla sang Negros (KRPIN), militante nga nagabayaw sang kinumo nga kamot tanda sang mainit kag rebolusyonaryo nga pagpanamyaw sa tanan nga Pulang kumander kag mga hangaway sa idalum sang Apolinario Gatmaitan Command-New People's Army Negros Island Operations Command (AGC-NPA), subong

man sa bug-os nga rebolusyonaryong pwersa kag pumuluyong Negrosanon sa signipikante nga kahiwatan sang ika-56 ka tuig nga pagsukat sang NPA. Nagpanadlong, nagtipon sang bag-ong kusog, nagpalig-on kag nakigbato tubtob nga nakaganar naman kita sang isa ka tuig nga mga kadalag-an sa liwat nga pagpa-abante sang demokratiko nga rebolusyon sang banwa paagi sa pangmalawigon nga inaway banwa sa isla sang Negros nga nagpaslaw sang demonyo kag mapintas nga rehimen US-Marcos II.



Determinado kag malig-on nga ginpamatud-an sang NPA sa isla paagi sa wala tupong nga pagsakripisyo nga gin-atubang kag ginpaslaw ang wala tupong nga terorismo sang estado nga ginklunsar sang US-Marcos Jr nga rehimen...

Nakurit na sa maragtas sang rebolusyon ang ginbilin nga palanublion sang aton mga rebolusyonaryong martir kag mga baganihan kaangay nila Rogelio Posadas, Ericson Acosta, Romeo Nanta, Kerima Lorena Tariman, Marilyn Badayos, Florida Ceballos, Noynoy Ponteras kag ang “Candoni 8” kag iban pa nga wala duha-duha nga naghalad sang ila kabuhi sa dalan sang rebolusyonaryong paghimakas sang pumuluyo para sa pungsodnon nga kahilwayan kag matuod nga demokrasya. Ang ila nga kaisog kag kaalam ang magaserbe nga inspirasyon sang masunod nga henerasyon nga may bag-ong kusog agud iabante ang rebolusyon sa mas mataas pa nga halintang.

Determinado kag malig-on nga ginpamatud-an sang NPA sa isla ang padayon nga pagsulong sa rebolusyon paagi sa wala tupong nga pagsakripisyo nga gin-atubang kag ginpaslaw ang wala tupong nga terorismo sang estado nga ginklunsar sang US-Marcos Jr nga rehimen paagi sa ginpasingki nga *focused military operations* (FMO) kag Retooled Community Support Program (RCSP). Ginapaslaw man sini ang mando sang imperyalismong US sa Armed Forces of the Philippines (AFP) nga tapuson na ang “*internal security problem*” (pangsulod nga problema pang-seguridad) agud mahatagan prayoridad ang “*external defense*” (panggwa nga depensa)-pangkonsentrar sa “paghanda para pangapinan ang pungsod” batok sa China nga sa esensya nagbutang sa pumuluyong Pilipino sa katalagman sa tunga sang nagahana nga paglupok sang inter-imperyalistang gyera.

Ginadayaw kag ginapasalamatan sang Com-

munist Party of the Philippines (CPP), NPA kag bug-os nga rebolusyonaryong kahublagan ang maisog kag padayon nga pagpakigbahin subongman ang wala nagahubas nga suporta sang malapad nga ginapigos kag ginahimuslan nga masang Negrosanon sa armadong paghimakas. Ang demokratikong rebolusyon sang banwa paagi sa pangmalawigon nga inaway banwa ang may pangmasang kinaiya. Kon wala ang pagpakigbahin sang masa sa rebolusyon, indi masarangan sang Partido kag NPA sa isla nga atubangon kag paslawon ang demonyo nga kapintas sang pasista nga rehimen US-Marcos II.

Ang pagpatuman sang neoliberal nga polisiya kag agresyon sang imperyalismong US nangin kabangdanan sang wala tupong nga kalalaon kag pag-usmod sang pangabuhian sang pumuluyo sa bug-os nga isla. Kadungan man sini ang pagpatuman sang iban pa nga kontra-pumuluyo kag kontra-rebolusyonaryong tikang nga nagapaantus sa kadam-an nga pumuluyong mamumugon, mangunguma, mamumugon sa uma, mangingisda, propesyunal, intelektwal lakip na ang iban nga petiburgesya sa syudad, pungsodnon nga burgesya kag pila ka seksyon sang nagahari nga sahi. Bangud sang *climate change*, ginbayo man sang natural nga kalamidad kaangay sang *El Niño*, asud-asod nga mga bagyo kag *La Niña*. Subongman ang paglupok sang bulkan Kanlaon kag tubtob subong nga pag-alburuto sini. Sa sulod sang pila lang ka bulan daku na ang kahalitan nga gintuga nga amo man ang gintunaan sang dugang nga pag-usmod sang palangabuhian sang masa sa mga kaumahan sang isla.



MARCH 2025
ISPESYAL NGA ISYU

ANG **Paghimakas**

Nagapasalamat ang *Ang Paghimakas* sa mga kontribusyon agud mangin madinalag-on ang ini nga isyu. Sa pagpauswag sang aton *Ang Paghimakas*, ginapangabay sa tanan nga bumalasa nga padayon nga mag-amot sang mga balita, piktyur, istorya kag iban pa nga sinulat. Nagapangayo man kami sang inyo mga suhestyon kag komentaryo paano pa gid ini pauswagon.



angpaghimakas@protonmail.com



negrosrevportal.wordpress.com

Sa subong, indi matago sa pumuluyo ang kainutil, bangkarote, makinaugalingon kag maki-dumuluong nga panindugan kag mga tikang sang US-Marcos nga rehimen. Wala ginasabat ang mga sandigan nga kinahanglanon sang pumuluyo sa baylo ginapasingki sini ang terorismo sang es-tado agud busalan ang baba sang mga kritiko kag disgustado sa nagahari nga hubon ni Marcos Jr.

Muklat kag wala-kataka ang pumuluyong Negrosanon sa pagpangita sang makatarunganon nga dalan para sa isa ka pagbag-o sosyal agud mahaw-as sa tuman nga pag-antus. Ini amo ang banas sang demokratiko nga rebolusyon sang banwa nga ginapamunuan sang sahing proletaryado paagi sa Partido Komunista. Ang pagpasakop kag pag-usoy sa dalan sang armadong paghimakas ang maathag kag solo nga solusyon agud sabton ang ugat sang sandigan nga problema sang sahing Negrosanon kag bug-os nga pumuluyong Pilipino.

Ini ang makatarunganon nga gyera nga na-gasabat sa handum sang pumuluyo sa paglab-ot sang matuod nga kahilwayan, demokrasya kag hustisya sosyal.

Ang naangkon nga bag-ong kusog sang re-bolusyonaryong kahublagan sa isla sa paglunsar sang kahublagan panadlong kag ang dugang nga kakahas sa pagpatuman sini. Daku ang kumpyansa sang Partido, NPA kag bug-os nga rebolusyonar-yong pwersa nga mapangibabawan kag liwat mapaslaw ang pagpanghadlok kag pagpamintas sang reaksyunaryong estado. Agud mapasulong ang inaway banwa sa mas mataas nga halintang, kinahanglan ang mataas nga mga sakripisyo sa pag-angkon sang inisyatiba sa pagpakig-away gerilya paagi sa absoluto nga pagpamuno sang Partido nga lab-uton ang himpit nga kadalag-an upod sa malapad nga pumuluyong Negrosanon kag bug-os nga pumuluyong Pilipino.

Kahublagan Panadlong sa isla, nag-ani sang kompre-hensibong kadalag-an sa NPA kag inaway banwa sa absoluto nga pagpamuno sang Partido

Madinalag-on nga ginpaslaw sang NPA sa absoluto nga pagpamuno sang Partido ang pa-sulit-sulit nga deklarasyon sang pasistang rehi-men US-Marcos II kag mga reaksyunaryong pwersa sini nga AFP-PNP kag NTF-Elcac nga dug-mukon ang NPA sa isla. Sa baylo, napreserba sang NPA ang iya kusog, napunggan ang habyog sang pag-atras kadungan sa pagpangibabaw sa gintuga nga halit sa ginpasingki nga FMO kag RCSP sa baseng masa sang mga larangan gerilya bunga sang pagtadlong sang mga kahuyangan sa pag-patuman sang pagpakig-away gerilya.

Hugot kag lig-on sa “magkatuhay apang indi separado” nga relasyon kag pagpamuno sang Partido sa mga yunit sang NPA sa isla. Bangud sini, madinalag-on nga napatuman sa sulod sang NPA ang mga hilikuton pang-ideolohiya, pulitika kag organisasyon. Ginapaseguro kag ginapalig-on ang pag-uyat kag aplikasyon sa unibersal nga teoryang ubay sang Marxismo-Leninismo kag Maoismo (MLM) sa rebolusyon Pilipino, pagsu-long kag pagpadaug sang demokratikong re-bolusyon sang banwa nga may sosyalistang perspektiba paagi sa pangmalawigon nga inaway banwa bilang pangkabilugan nga linya pampu-litika subongman hugot nga pagpatuman sang mga programa, linya, polisiya kag mga patakaran sa “sentralisado nga pagpamuno kag desentralisado

nga operasyon” sang demokratikong sentralismo.

Sa sulod sang isa ka tuig (Marso 2023-Marso 2024) samtang naga-atubang sang nagahagunos nga kampanyang kubkob nga atake sang kaaway, madinalag-on nga nakonsolida ang NPA sa MLM. Wala mapunggan nga nalunsar ang pagtuon sang BKP, IKP kag iban pa nga kurso pang-Partido. Sa pagpatuman sang Kahublagan Panadlong, nag-serbe nga ubay ang serye sang mga pagtuon sang duha ka edisyon sang Rebolusyon, mga pahayag sang Komite Sentral sa ika-55 nga anibersaryo sang CPP kag NPA, mga dyornal sang Partido nga Ang Bayan kag Ang Paghimakas ilabe na gid ang mga ginpapanaug nga *memorandum* kag *advisories* sang pungsodnon nga sentro sang Partido. Antes pa man, ginhimo ang paglubad sang mga doku-mento kag nakapatuhaw sang mga instruktur matapos ang madinalag-on man nga paglunsar sang paghanas sang mga ini.

Kadalag-an sa NPA ang pagtigayon sang pagpangusisa-sosyal kag pag-analisa sang mga sahi. Nagerbe nga ubay ang pagsadokumento kag pagkumpleto sang mga importanteng datus sa pagpukaw, pag-organisa kag pagpahulag sang masa sa rehiyon kag sa sakop sang mga larangan gerilya. Nagmadinalag-on man ang gintigayon nga pagsumada sang komprehensibo nga re-bolusyonaryong inagaihan sa isla. Nakapunpon



sang mga bulawanon nga leksyon upod ang pagsaway kag pagsaway sa kaugalingon sa tunga sang mga hangaway kag opisyal para sa liwat nga pagbangon kag pagpangibabaw nga may bag-ong kusog.

Hilway nga napatuman sang NPA ang sentral nga hilikuton sini sa paglunsar sang demokratiko nga rebolusyon sang banwa paagi sa pangmalawigon nga inaway banwa bilang nagapa-nguna nga hinganiban sang Partido kag pumuluyo sa pagpukan sa mapiguson nga sahi, sa pagwasak sa mala-kolonyal kag mala-pyudal nga sistema, kag sa pagtukod sang demokratikong estado sang pumuluyo kag pagpanday sang sosyalistang sosyedad. Namentinar ang lima ka aktibo nga mga larangan gerilya sa bilog nga isla. Mas naglapad ang lugar nga sarang mahulagan kag maniobrahan sang NPA. Kadungan man ang pagsinsin sang nagatalikdanay nga mga larangan gerilya nga naghatag sang maligwa nga dalan sa teatro sang gyera kag inaway banwa sa isla. Halos 5% ang pagdako sang organisadong masa kabangdanan sang malapit 10% nga pagdako sang pagkabilugan nga isip sang baseng masa. Ligwa nga natungdan sang NPA ang hilikuton masa nga nakapatuhaw sang mga bag-ong kontak sa rebolusyon nga naglab-ot sang halos malapit sa walo ka pilo ukon 800% nga isip sang paguswag. Sila ang bag-ong kusog nga makonsolida kag mapahulag sa rebolusyon halin sa wala kahubasan nga bubon sang baseng masa.

Bangud sang ila suporta, nagmadinalag-on nga natigayon ang pagkonsolida kag pagpataas sang rebolusyonaryong kamuklatan sang linibo ka mga pwersa agud atubangon ang kontra-rebolusyon kag reaksyunaryong gyera sang pasistang rehimen US-Marcos II. Sandig sa aktwal nga sitwasyon sang gyera sa isla, madinalag-on nga napangibabawan paagi sa sekreto nga mga pamaagi agud malunsar ang mga pagtuon sa

Pambansang Demokratikong Paaralan (PADEPA) kag pulitiko-militar nga mga oryentasyon sa hanay sang masa.

Napatingkad ang koordinasyon kag pagbinuligay sa tunga sang mga istap sang larangan kag rehiyon sa hilikuton propaganda. Ngipon sa ngipon nga ginhublasan sang NPA kag rebolusyonaryong masa ang mga kabutigan kag pagpatalang nga padugi sang AFP, PNP kag NTF-Elcac.

Aktibo nga namentinar ang lima ka mga larangan gerilya nga relatibo may bastante nga kusog sang Pulang hangaway halin sa *front guerrilla unit*, milisya sang banwa kag iban pa nga yunit gerilya. Sila ang nagapanguna kag armadong makinarya sang Partido agud komprehensibo nga matungdan ang mga rebolusyonaryong hilikuton ilabe na ang armadong paghimakas bilang sentral nga katungdanan sini agud agawon ang gahum pulitika sa nagahari nga sahi.

Nakalunsar ang NPA sang malapit 80 ka nagkalain-lain nga tipo sang opensibang aksyon militar. Nagmadinalag-on kag nakakumpiska sang kapin 20 ka mga armas, mga bala kag iban pa nga kagamitan militar. Ini ang sarang ipa-armas sa mga bag-ong rekrut nga NPA, mga milisya sang banwa kag iban pa nga katapo sang yunit gerilya. Nagtuga sang masobra 20 ka kaswalti sa hanay sang AFP, PNP kag mga tagpaniktik sini. Nangin matingkad diri ang madinalag-on nga kontra-kubkob nga kampanya nga ginlunsar sang Roselyn Jean Pelle Command (RJPC)-NPA batok sa tropa sang 79th IB sang Oktobre 2024 sa binukid nga bahin sang Calatrava kag serye sang opensiba nga ginlunsar sang Romeo Nanta Command (RNC)-NPA batok sa mga “mata kag dalunggan” sang 94th IB sa baryo sang Carabalan, Hima-maylan City tanan sang Negros Occidental. Naglanog man sa isla ang ginpatuman sang Leonardo Panaligan Command (LPC)-NPA nga pag-sunog sang makahalalit nga mga ikwepo kaangay

sang 2 ka *backhoe*, pison kag *dump truck* nga nagapatigayon sang kontra-pumuluyo kag maki-dumuluong nga *farm to market road* sa Sityo Manghuya, Brgy. Aya, La Libertad, Negros Oriental sadtong Pebrero 8, 2025 sang gab-i. Ini ang ginapanag-iyahan sang despotikong agalon may duta, burgesyang komprador kag pulitiko nga pamilya Limkaichong.

Madinalag-on man nga nakonsolida ang NPA sa mga sandigan nga prinsipyo paagi sa pagtuon kag paghanas pulitiko-militar. Kolektibo nga nagatuon sang mga kurso sa PADEPA, dyornal sang Partido, mga pungsodnon nga *memorandum*, *advisories* kag iban pa nga kurso kag dokumento sang Partido. Nakalunsar sang sandigan nga kurso pulitiko-militar sa konsentrado kag *crash course* nga pamaagi samtang adlaw-adlaw nga paghanas sang numerasiya-literasiya, instruksyon kag hilikuton propaganda.

Ginpaseguro sang Partido ang hugot nga pagpatuman sang salsalon nga disiplina sa sulod sang NPA. Adlaw-adlaw, ginasilil sa huna-huna sang Pulang hangaway ang pagkabuhi sang mga sandigan nga regulasyon kag patakaran bilang hangaway sang pumuluyo. Ginapalig-on ang proletaryo-rebolusyonaryong panan-awan, panindugan kag metodo paagi sa 3 *check-up* kag pagsaway-pagsaway sa kaugalingon.

Lubos gin-alagaran sang NPA ang masang ginahimuslan kag ginapigos sa tunga sang inutil nga serbisyo-sosyal sang rehimen US-Marcos II. Linibo ka mga pumuluyong Negrosanon ang nahatagan sang serbisyo medikal, pagpataas sang produksyon paagi sa dagyaw-alayon kag paghatag sang nagakaigo nga hustisya sa mga pamilya sang mga biktima sang pagpang-agaw sang duta kag palangabuhian, intimidasyon, pagpamatay kag iban pa nga porma sang pagpanglapas sang tawhanon nga kinamatarung sang pumuluyo batok sa pasistang AFP, PNP, NTF-Elcac kag iban pa nga mga mapintas nga makinaryas sang rehimen US-Marcos II.

Hugot nga gin-uyatan sang NPA ang linyang masa. Epektibo nga ginsabat sang NPA paagi sa wala kataka nga pagpukaw, pag-organisa kag pagpahulag sang isganang anakbalhas sa mga kaumahan sang isla. Sila ang nagahimakas nga katawhan nga indi mapukan kag magakurit sang bag-ong kasaysayan sang katilingban batok sa pagpanghimulos kag pagpamigos sang reaksyonaryong estado.

Maisog nga naduso ang gagmay apang lapta-lapta nga kontra-pyudal kag kontra-pasista nga mga kahublagan masa. Nangin matingkad ang lapnagon nga pagpahulag sa masa dira sa simple

nga kooperasyon sa pagpataas sang produksyon sa mga mangunguma, pagpataas sang sweldo sang mga mamumugon sa uma kag pagdemanda sang subsidyo sa gobyerno sa tunga sang nagaluntad nga kalamidad nga naghalit sa panguma kaangay sang *El Niño*, *La Niña*, sunud-sunod nga mga bagyo, pagtuhaw sang mga *armyworm* kag *tiempos muertos*. Ginpangapinan man ang duta kag palangabuhian sang pumuluyong Negrosanon batok sa *neoliberal* nga mga pagpang-atake kag iban pa nga maki-dumuluong nga proyekto kag interes. Ginlunsar ang serye sang dayalogo kag rali protesta sa LGU kag Kapitolyo sang probinsya sadtong tunga-tunga nga bahin sang tuig 2024 batok sa pribado nga kompaniya sang HAPI/Araneta-Consunji. Wala sang nagakaigo nga proseso kag puno sang iregularidad, sa baylo pilit nga gintamnan sang *oil palm* ang 6,562 ek-tarya nga duta sa mga barangay sang Gatuslao kag Payawan sang Candoni, Brgy. Pinggot sang Ilog kag Brgy. Damutan sang banwa sang Hinobaan, tanan sang Negros Occidental. Ini ang nagadislokar sang duta kag palangabuhian sang pumuluyo sa nasambit nga mga lugar lakip na ang tumandok.

Samtang sa kasyudaran, asud-asod ang paghulag sang pumuluyong Negrosanon agud itibong ang ila mga tawhanon nga kinamatarung kag demokratikong interes. Ginasulong ang kontrapasismo kag kontra-imperyalistang linya sang paghimakas batok sa maki-dumuluong, kontra-pumuluyo nga mga patakaran, neoliberalismo nga pagpang-atake kag pasismo sang estado. Ginlunsar ang serye sang mga dayalog, rali-protesta kag iban pa nga porma sang paghimakas masa batok sa wala untat kag nagatimbuok nga pagsaka sang presyo sang mga sandigan nga panginahanglanon sang katawhan kaangay sang pagkaon, beste, medikal, tubig, kuryente, edukasyon kag iban pa nga sosyal nga serbisyo. Ginaduso man sini ang makatarungan nga sweldo kag benepisyo sa tunga sang uyaya nga pagsabat sang US-Marcos nga rehimen sa problema sang lapnagon nga implasyon. Matingkad diri ang wala untat nga pagpamatok sang mga drayber kag opereytor sa transportasyon batok sa *jeepney modernization* nga programa sang rehimen US-Marcos Jr. Ginbuyagyag kag ginpamatukan man nila ang kapintas sang estado kaangay sa pagpauntat sang kampanyang *crackdown* kag *redtagging* batok sa mga progresibong *sectoral organization*, *party-list* kag mga aktibista. Kadungan sini ang pagpanawagan sa pagbungkag sang NTF-Elcac kag pagbasura sang MO32, kag pagpauntat sang militarisasyon sa kaumahan.

Ginasuporta man sini ang kawsa kag paghimakas sang pumuluyong Palestino batok sa pagpang-atake sang pungsod Israel kag iskalasyon sang kalibutanon nga gyera sang US-NATO.

Sa ngalan sang “peke nga kauswagan,” dulongan nga nagpamatok ang Negrosanon sa isyu sang reklasipikasyon kag reklamasyon sang mga kadutaan kag kabaybayunan nga nagadislokar sa duta kag palangabuhian sang imol nga taga-syudad, iban nga sahing mala-proletaryado sa sentrong syudad, mangingisda kag mga mangunguma sa mga kaumahan sang isla.

Ginpalig-on sang NPA ang sandigan nga alyansa sang sahing mamumugon kag mangu-nguma. Ang subong nga pagbaskog sang rebolusyonaryong armadong pwersa sa kaumahan paagi sa nagaluntad nga mga larangan sa isla, ang repleksyon man sa nagalig-on nga sandigan nga alyansa sang rebolusyon sa kaumahan. Paagi sa pagpamuno sang Partido, padayon ang paghabig sang positibo, motibo kag muklat nga nahanungang pwersa nga suportahon ang paghimakas sang sandigan nga alyansa samtang ginaligwin ang mga bat-ulan kag despotiko nga agalon may duta kag nagahari nga sahi bilang mga target nga kaaway sang rebolusyon. Bangud sini nga taktika, napahulag kag napundar ang mga taktikal nga alyansa sa sektor sang mga mangunguma, mamumugon, kabataan, kababaihan kag mga patriyotiko-demokratikong pwersa kaangay sang tawong simbahan. Ini ang nag-ani sang pulitiko-militar nga mga kadalag-an nga naglanog sa isla ilabe na ang wala kataka nga pagpanawagan sa pagpadayon sang pagpakigsugilanon sa kalinong para ugaton ang kawsa sang armadong konplikto kag ipaluntad ang matarung kag malawigon nga kalinong sa pungsod.

Ginpamatud-an sang NPA sa isla nga isa ini ka indi matay-og nga hukbo sang pumuluyo bangud nagapakig-away ini sa interes kag handum sang masa para sa matuod nga kahilwayan kag demokrasya. Uyat sang mga Pulang kumander kag

hangaway ang determinasyon kag kakahas sang nauna nga mga kumander nga nagpatuman sang armadong paghimakas sa isla kaangay ni Apolinario “Boy” Gamaitan kag iban pa nga mga kumander nga naghilad sang ila mga kinaadman, kaalam kag kaisog sa rebolusyon. Bitbit man subong sang NPA ang mga bulawanon nga leksyon resulta sang mga dungganon nga kahublagan panadlong halin sang 1968, 1992 kag ika-tatlo nga kahublagan panadlong nga ginpatuman sang 2016. Inspirasyon sang NPA sa isla ang mga rebolusyonaryong kontribusyon sang mga kumander kag kadre sang Partido nga nagbuhis sang kabuhi para sa pigos nga pumuluyo sa tunga sang masiot nga dalan sang armadong paghimakas sang ulihi nga bahin sang dekada 1990 tubtob tuig 2024 nga sanday Leonardo “Ka Jessie” Panaligan, Roselyn “Ka Jane” Pelle, Danilo “Ka Maoche” Bertolano, Rachelle Mae “Ka Hannah” Palang, Armando “Ka Pao” Sumayang Jr, Romeo “Ka Ponso” Nabas, Romeo “Ka Juaning” Nanta kag Rogelio “Ka Cocoy” Posadas, Ericson “Ka Fredo” Acosta, Kerima Lorena “Ka Ella” Tariman, Marilyn “Ka Mona” Badayos, Florida “Ka Panie” Ceballos kag iban pa.

Ang 56 ka tuig nga pagsulong sang armadong paghimakas kag pangmalawigon nga inaway banwa ang nagdala sang kalig-on kag determinasyon sa bug-os nga rebolusyonaryong kahublagan kag nakaangkon sang bag-ong kusog paagi sa subong nga kahublagan panadlong padulong sa hugna sang mga kadalag-an. Gani, ang Partido kag NPA upod sa tanan nga rebolusyonaryong pwersa sa rehiyon wala nagakalingkang sa mga pagpamintas kag pagpamahug sang reaksyonaryo nga pwersa nga batuan kag paslawon. Atubangon kag pangibabawan ang mga pagpanghangkat nga nagakinahanglan sang mataas nga mga sakripisyo agud mapasulong ang inaway banwa sa mas mataas nga halintang tubtob sa kadalag-an upod sa malapad nga pumuluyong Negrosanon kag bug-os nga pumuluyong Pilipino.



*Ginpamatud-an sang NPA sa isla nga isa ini
ka indi matay-og nga hukbo sang pumuluyo
bangud nagapakig-away ini sa interes
kag handum sang masa para sa matuod
nga kahilwayan kag demokrasya.*



Pabaskugon ang NPA nga magpakig-away batok sa pasismo sang rehimeng US-Marcos II

Sang nagligad nga tuig, hugot nga gin-pamunuan sang Partido paagi sa KRPIN ang pag-sulong sang demokratiko nga rebolusyon sang banwa sa kaumhan kag kasyudaran sa isla sang Negros. Kadungan sini ang seryoso nga pagsabat kag panugod nga pagpabuylo sang kahublagan panadlong nga ginpanawagan sang Komite Sentral sang Communist Party of the Philippines (CPP) sadtong Disyembre 2023 bunga sang internal nga mga kahuyangan sa ideolohiya, pulitika kag organisasyon nga nagdulot sang mga kahalitan sa Partido, baseng masa kag mga pag-atras sa kusog sang New People's Army (NPA). Puno sang rebolusyonaryong optimismo dala ang kabakod kag hugot nga paghiliusa sang mga kadre kag katapo sang Partido, upod ang mga Pulang kumander kag hangaway sang NPA nga mapangibabawan ang mga pangsulod nga kahuyangan sang bug-os nga rebolusyonaryong Negrosanon samtang ginaduso ang mga rebolusyonaryong hilikuton kag katungdanan sa tunga sang nagasingki nga pasismo sang estado.

Sa sulod sang isa ka tuig, nag-angkon ang rebolusyonaryong kahublagan sa isla sang kongkreto nga mga kadalag-an sa nagkalain-lain nga patag sang pagsulong. Nagakahulugan ini sang pagbawi kag relatibo nga pagpangibabaw sa mga gintu-mod nga mga kahuyangan sang suhetibismo sa dagway sang empirismo, wala-tuo nga oportunistismo, konserbatismo pulitiko-militar, liberalismo

kag ultra-demokrasya. Samtang nagapalig-on sang internal nga kusog, nakig-away kag madinalag-on nga ginpaslaw ang nagabagusbos nga atake sang kaaway sa isla. Ini nga pagpaninguha ang nag-amot sa pungsodnon nga pagpangibabaw sang kabilugan nga rebolusyonaryong pwera sa pagpakig-away gerilya batok sa estratehiko kag reaksyonaryong gyera sang rehimeng US-Marcos II.

Liwat nga paslawon ang kontra-rebolusyonaryong gyera sang US-Marcos nga rehimen. Isulong ang inaway banwa sa mas mataas nga halintang kag angkunon ang kalitatibo nga pag-igpaw sa tanan nga bahin. Dugang nga magpangahas sa pagpatuman sang kahublagan panadlong kag maisog nga tungdan ang mga mapang-away nga tahas.

1. Absoluto nga pamunuan sang Partido ang NPA

Hugot nga ginapaseguro sang Partido ang absoluto nga pagpamuno sa NPA. Absoluto man nga ginatukod ang mga yunit sang Partido sa mga yunit sang NPA. Ginatukod ang mga Sanga sang Partido sa mga kumpanya kag platon nga pormasyon sang NPA. Ini ang sandigan nga yunit sang Partido sa sulod sang NPA. Samtang sa mga iskwad kag tim, ginatukod man ang grupo sang Partido. Paagi sini, ginapaseguro ang kolektibo nga pagpamuno kag nga hugot nga mauyatan ang linya, programa, plano kag mga rebolusyonaryong

*Magkatuhay apang indi separado ang kinaiya
sang pagpangulo sa sulod sang NPA.*



patakarán kag pat-ud nga mapatagus sa masang katapuan sang Partido kag mga Pulang hangaway.

Sa mga sanga sang Partido, ginatukod ang Kalihiman (KH) nga ginakomposar sang sekretaryo, ikaduha nga sekretaryo sa edukasyon kag ikaduha nga sekretaryo sa organisasyon. Sila ang nagadumala sang mga rebolusyonaryong hilikuton sa adlaw-adlaw. Ginapundar man ang Komite nga Tagpatuman sang Sanga nga responsable sa pagpatuman sang plano kag programa sang Partido samtang wala pa ang pulong sang Sanga sang Partido.

Magkatuhay apang indi separado ang kinaiya sang pagpangulo sa sulod sang NPA. Sa mga kumpanya kag platon nga pormasyon sang BHB, ginatukod ang mga Kalihiman sa Partido. Sa masami sila man ang nagaserbe nga yunit kumand sa sulod sang NPA. Ang kalihiman (KH) ang nagatiglawas sang Partido samtang ang yunit kumand (YK) ang nagatiglawas man sang Pulang hangaway. Sa pormasyon kumpanya, ang yunit kumand ang ginakomposar sang kumander (Coy CO), ikaduha nga kumander (Vice-Coy CO) kag opisyal sa politika (Political officer). Samtang sa platon, may kumander (Platoon-CO), Vice-Platoon-CO) kag Instruktor sa Politika (Political Instructor). Sila ang adlaw-adlaw nga nagadumala sang yunit sang Partido kag BHB santo sa ila indibidwal nga responsibilidad. Ang mga PO/PI amo ang nagatiglawas sang Partido kag responsable sa pagpatuman sang pampulitika nga aspeto. Ila ginapaseguro ang linya, programa, polisiya kag mga patakarán sang Partido. Sila man ang nagapanguna sa pag-implementar sang mga plano pulitikal sang Sanga sang Partido sa sulod sang NPA. Samtang ang mga CO kag VCO ang responsable sa seguridad kag pang-militar nga hambalanon sa kada adlaw. Sa ipit-ipit nga sitwasyon, ang CO amo ang responsable nga magpanguna sa paghimo sang desaysibo nga tikang militar para ipreserbar ang seguridad sang kabilugan nga pwersa. Samtang ang ikaduha nga kumander ang natalana para sa paglatag sang mga pwersa sa paniktik kag kontra-paniktik, magtipon sang mga impormasyon kag magsumite sa yunit kumand para tun-an kag analisahon. Bilogon ang tanan

nga datus kag himuan sang mga nagakaigo nga plano para sa opensiba kag kontra-opensibang tikang batok sa taktikal kag estratehiko nga plano sang kaaway.

Sa iskward sa idalum sang platon, ginatukod ang mga Grupo sang Partido. May iskward-kumand nga nagadumala kag nagapatuman sang pulitiko-militar nga aktibidad sa adlaw-adlaw. Ini ang ginakomposar sang Iskward-lider (IL), Tal-os nga IL (TIL) kag Giya Pulitka (GP). Ang ini nga istruktura ang nagatagos man sa mga tim sang NPA.

May panahon nga ginatukod ang mga *independent squad* sandig sa prayoridad sang trabaho sa pagpalapad kag rekoberi. Ini ang temporaryo nga areglo nga indi kinahanglan magdugay. Ini ang ginakumpasan sang komite sang Partido diin man siya gintalana. Indi man ini napaidalum sa dinamikong platon nga nagaluntad. Gani, ginatukod diri ang mga Sanga sang Partido. May kalihiman (KH) kag yunit kumand (YK) nga nagapaseguro man sang pulitiko-militar nga mga hambalanon kaangay sang dinamikong platon nga nagaluntad sa mga larangan gerilya.

Ginapanday sini ang mabaskog kag indi malutos nga NPA paagi sa komite sang Partido kag gintalana nga mga kumand sang operasyon sa tanan nga lebel. Dungan kag aktibo nga nagandar ang dinamismo sang “dual nga liderato” sa mga yunit kag pormasyon sang NPA. Ang mga Pulang kumander kag hangaway ang ginapanday sa pulitiko-militar nga ikasarang nga hugot nagayuat sang pangkabilugan nga linya pampulitika sang demokratiko nga rebolusyon sang banwa nga may sosyalistang perspektiba paagi sa pangmalawigon nga inaway banwa. Paagi sa Partido, ginapaseguro ang absoluto nga pagpangibabaw sang pulitika sa militar kag istrikto nagasunod sa tatlo ka disiplina kag walo ka punto sa tagsa ka paghulag.

Sa kabilugan, ang absoluto nga pagpamuno sang Partido sa NPA, nagakahulugan nga ang politika ang magamando sa pusil. Militante nga manguna ang Partido nga yara sa nagkalain-lain nga pormasyon sang hukbo sang banwa tubtob sa mga rebolusyonaryong organisasyon masa sa pagpatuman sang rebolusyonaryong linya, mga

hilikuton, patakaran, polisiya kag disiplina.

2. Konsolidahon ang NPA sa Marxismo-Lenis-mo-Maoismo kag padayon nga isulong ang Kahublagan Panadlong

Ginkilala sang Partido sa isla ang mga internal nga kahinaan sa ideolohiya, pulitika kag organisasyon nga nagtuga sang dako nga kahalitan sa Partido, NPA kag baseng masa nga nagdulot sang mga pag-atras sa bug-os nga rebolusyonaryong pwersa sang nagliligad nga mga tinuig. Ang ginlunsar nga kahublagan panadlong ang dako man nga kabangdanan sang aton pagbawi sa tanan nga bahin. Nagpakita nga ginpaslaw naton ang panggwa nga paktor nga tudo-buylo nga atake sang kaaway samtang gina-away man ang internal nga sakit sang suhetibismo sa dagway sang empirismo sa aton hanay. Ini ang aton napangibabawan apang kinahanglan sang dugang nga kakahas sa pagpalig-on sang ideolohikal nga pundasyon nga mangin ubay sa aton rebolusyonaryong praktika base sa kongkretong kahimtangan sa isla.

Sa ubay kag inspirasyon sang kahublagan panadlong, dapat nga paandaron sang Partido ang departamento pampulitika. Ginapasiguro sini ang masami nga pagpatuman sang edukasyon pang-ideolohiya kag pangpolitika sang mga Pulang kumander kag hangaway, lakip na ang mga paghanas sa ila sa sini nga aspeto. Ipaathag sa ila ang mga sandigan nga prinsipyo sang pungsod-non-demokratiko nga rebolusyon paagi sa pang-

malawigon nga inaway banwa nga may sosyalistang perspektiba kag ang tatlo ka integrado nga hilikuton sang inaway banwa. Ginapat-od sang Partido ang epektibo nga pagpahulag sang mga pwersa sang NPA kag ang paghatag sang pat-od nga instruksyon sa ginatalana nga mga hilikuton.

Ginapaseguro sang Partido ang madalom nga paghakup sang NPA kag rebolusyonaryong Negrosanon sa MLM. Matinugahon nga gina-aplikar ang inaway banwa sa kongkreto nga kahimtangan sang ekonomiya kag politika sa isla nga wala ginahamulag sa kabilugan nga pagsulong sang rebolusyon Pilipino. Epektibo kag matinugahon nga ginapatuman sang Partido ang plano sa edukasyon sang rehiyon sa pag-angat sang pang-ideolohiya kag pangpolitika sang NPA. Ginapangunahan sang Partido nga malunsar ang tatlo ka halintang sang kurso pang-Partido (BKP, IKP kag AKP) kag iban pa nga kurso sang Partido agud pataason ang naabot nga rebolusyonaryong praktika sang hangaway sang banwa.

Ang dako nga isip sang katapuan sang aton yunit milisya kag iban pa nga pormasyon sang lokal nga yunit gerilya, ang malahaloon man nga aspeto sa pagpa-abante sang pangmalawigon nga inaway. Sila ang reserba nga kusog sang NPA. Ang lubos nga konsolidasyon kag pagpahulag sa ila, ini ang matuod nga inaway gerilya sang masa. Kinahanglan nga mapataas man ang ila ikasarang sa pagtuon sa sitwasyon sang gyera, ihibalo sa mga teknika kag taktika sang kaaway, disiplina militar, sekreto nga paghulag kag mga gerilyang taktika kag operasyon bilang nagapanguna nga makinarya sang NPA sa isla sa paglunsar sang mga opensibang aksyon.

Gani kinahanglan mahatagan sang ispesyal nga igtalupangod sa pagsulong sang gerilya nga pagpakig-away sang masa. Buot hambalon ang paghatag-inisyatiba sa milisya sang banwa sa pagpasakop sa inaway banwa kag paglunsar santo sa kinaiya sang taktikal nga opensiba batok sa nakalapta kag vulnerable nga bahin sang kaaway. Seguruhon nga mahatagan sang oryentasyon kag kahanasan ang masa sa mga hinganiban nga pwede nila makuha ukon mapatuhaw. Tudluan sila sang mga taktika kag mga kinaiya sang malaparan nga armadong pagpakig-away kaangay sang kahublagan sa paghaboy-granada o' haboy-molotob kag iban pa.

Sa nagasingki nga mga FMO kag RCSP, dapat mangin matinugahon kag nagakasanto nga pagkonsolida sang tanan nga mga pwersa; sa Partido, NPA kag rebolusyonaryong masa. Padayon nga ilunsar ang mga pang-Partido nga



pagtuon kag ang PADEPA sa NPA, mga lokal nga gerilya nga pormasyon kaangay sang yunit milisya, kag mga organisasyon masa ilabi na tuhoy sa mga sandigan nga prinsipyo kag patakaran sang Partido kag mga sinulat nanday Kaupod Mao Zedong, Kaupod Ho Chi Minh kag Kaupod Jose Maria Sison partikular sa inaway banwa. Tagaan man sang prayoridad ang politiko-militar nga paghanas sang mga Pulang hangaway kag yunit milisya kag ang sandigan nga kurso para sa mga opisyal para dululungan ang pag-uswag sang ihibalo sa rebolusyon kag ikasarang sa inaway. Seguraduhon ang kaluwasan sa pagpatigayon sang mga pagtuon kag paghanas.

Agud mapaseguro nga gilayon matumod ang mga yabe nga isyu nga makapukaw, maka-organisa kag makapahulag sa mas madamo kag malapad nga masa, desaysibo nga mapatuman ang hilikuton SICA (ukon pangsosyedad nga imbestigasyon kag pag-analisar sang mga sahi) sa mga organo sang Partido kag mga yunit sang NPA. Importante nga mapataas man ang aton ikasarang sa paglunsar sang mga kampanyang masa halin sa lebel sang sityo kag inter-sityo, hasyenda kag inter-hasyenda pakadto sa inter-baryo, municipal, distrito tubtob sa lebel sang probinsya kag rehiyunal nga sakop. Ang mga nabalay nga plano sa kampanya sang mga rehiyon kag mga larangan gerilya, dapat pursigido nga ma-implementar.

Padayon nga ikampanya ang pagtuon sang sumada sang rehiyon kag mga organo sang Partido agud mauyatan ang mga leksyon sa positibo kag negatibong inagihan sa nagliligad nga mga tinuig nga pakigrebolusyon. Ginasigahum nga ang tanan nga mga organo ang magpanikasog nga maglunsar sang sumada sa ila mga rebolusyonaryong inagihan. Padayon man nga maglunsar sang mga pagtuon sa mga sandigan nga dokumento nga gintalana sang Komite Sentral kaangot sa paglunsar sang kahublagan panadlong. Ini nga mga pagsumada sang rebolusyonar-

yong inagihan kag pagtuon nagatinguha sa pagpangibabaw sang empirisismo sa dagway sang mekanikal nga estilo sang pagtuon kag pagtrabaho kag sa paghibalo kag paghanas sa pagaplikar sang MLM sa kongkretong kahimtangan sa Pilipinas kag pagpauswag sang aton rebolusyonaryong praktika.

Dapat maid-id nga gina-usisa sang mga responsable nga kadre sang Partido ang pag-uswag sang pagpatuman sang mga rebolusyonaryong hilikuton, kag ginadumalahan ang mga pagtasa kag pagsaway kag pagsaway sa kaugalingon sa kubay sang NPA. Sandig sini, dapat italana ang pangkabilugan nga direksyon paagi sa pagbalay kag pagpatuman sang pat-od nga plano sa partikular nga mag-amot sa kadalag-an sang Negrosanon kag rebolusyon Pilipino.

Ang mapagsik nga pangpolitika nga hilikuton sa sulod sang NPA ang magapataas sang kamuklatan kag kahandaan nga makig-away sang mga Pulang kumander kag hangaway kag malig-on nga magpanday sang ila espiritu nga mag-alagad sa pumuluyo. Ginapanday man sini ang hugot nga paghiliusa sang hukbo sang banwa kag masa subongman sa tunga sang opisyal kag hangaway kag pagsakdag sang demokrasya sa patag sang ekonomiya, politika kag militar sa sulod sang NPA.

3. Pasingkion ang inaway banwa paagi sa paglunsar sang lapnagon nga taktikal nga opensiba

Sang nagligad nga tuig, matapos nga natumod naton ang kahuyangan sa pagpakitid sa kaugalingon kag sobra nga konsentrasyon dira sa aton lima ka tuig nga sumada (2017-2022), desaysibo nga ginhimo naton ang pila ka pag-adyas sa aton paghulag sandig sa aktwal nga kusog sang kaaway kag halintang sang baseng masa. Nakaganar kita sang mga kadalag-an sa nagkalain-lain nga aspeto sang pagsulong. Ini

.....

Ang mapagsik nga pangpolitika nga hilikuton sa sulod sang NPA ang magapataas sang kamuklatan kag kahandaan nga makig-away sang mga Pulang kumander kag hangaway kag malig-on nga magpanday sang ila espiritu nga mag-alagad sa pumuluyo.



ang tanda sang aton pagpangibabaw nga nagpre-serba sang kabilugan nga rebolusyonaryong kusog. Kinahanglan nga uyatan naton sang hugot ang mga naangkon nga kadalag-an. Indi mangin kampante kag hugot man nga uyatan ang mga bulawanon nga leksyon.

Dapat nga ipadayon ang pagpangibabaw sa mga kahuyangan sa “*self-constriction*” kag tuman nga konsentrasyon sang mga yunit sang NPA. Mangin maalamon sa pag-aplikar sang gerilyang taktika sa konsentrasyon, dispersal kag pagsaylo santo sa sitwasyon sang gyera. Anihon kag pauswagon ang nalab-ot sa hilikuton ekspansyon. Dugang palaparon kag padalumon ang mga erya sa tanan nga larangan gerilya. I-angat ang mga organisasyon masa paagi sa pagkonsolida sa ila. Tinguhaon nga makapalapad guwa sa masarangan nga sakupon sang mga FMO kag RCSP agud mas mangin ligwa ang maniobra kag matigayon ang hilikuton masa, militar kag iban pa nga kumprehensibo nga hilikuton. Subong man, mangin matinugahon sa pagrekober kag pagmentina sang mga konsolidado nga erya agud magiyahan ang mga masa sa ila nga pagbato kag pag-atubang sa mabaskug nga atake sang kaaway.

Agud nga mapundar ang mga teatro sang gyera, kinahanglan nga maghimo sang desaysibo nga plano sa pagpabakud sang mga larangan gerilya kag pagsira sang mga bulho sa tunga sang mga ini. Importante nga sangkap ang paglab-ot sang mga larangan gerilya sang tipikal nga istruktura sang pwersa nga isa ka kompanya nga may platun bilang sentro de grabidad kag ang iban nga mga yunit gerilya nga nagalapta sa mas malapad nga radyus. Kinahanglan man pauswagon ang pagpamuno kag koordinasyon agud maangkon ang mas daku kag pinakamaayo nga ikasarang sang

rebolusyonaryong kusog.

Kinahanglan ang dugang nga pagpadaku sa kusog sang NPA. Dapat nga himuon nga kampanya ang pagrekrut sang NPA gikan sa kaumahan, kasyudaran kag ang masunson nga pag-atipan sa ila. Hanason sila sa politiko-militar paagi sa direkta nga pagpasakop sa mga rebolusyonaryong integradong hilikuton. Yabe man diri ang paglunsar sang daku kag gagmay apang madamu kag madinalag-on nga taktikal nga opensiba batok sa kaaway. Kinahanglan nga tumukan ang paglunsar sang mga atritibo kag anihi-latibo nga taktikal nga opensiba sa balayon sang gerilya nga pagpakig-away. Kaangay nga ginapa-antus ang pasistang kaaway sa indi maisip nga “kagat sang madamo nga subay” sa tanan nga bahin sang lawas sini. Samtang pulupanahon nga gina-igo naton sila sa ulo sa kusog-platun nga mga taktikal nga opensiba-kumbinasyon sang pinili kag may impak nga mga ispesyal nga operasyon sa sentrong syudad kag mga banwa. Diri kita makapatuhaw sang mga bag-o kag potensyal nga mga kadre militar, kumander kag hangaway sang NPA. Dapat mapatuhaw man ang mga pampulitika nga mga kadre sang Partido paagi sa paglunsar sang malapnagon nga kontra-pyudal nga paghimakas kag mga kampanyang masa katimbang ang madasig nga pagpalapad kag pagkonsolida sang baseng masa sa bilog nga isla.

Kasubong sa paglunsar sang madinalag-on nga taktikal nga opensiba, kinahanglan man ang lapnagon nga paglunsar sang agraryong rebolusyon kag iban nga kampanyang masa. Ang rehiyunal kag partikular nga plano sa kampanyang masa, kinahanglan nga pursigido kag kumphensibong ma-implementar. Dapat mapangibabawan ang kahuyangan nga makuntento lang sa paglunsar sang kampanyang masa tubtob sa

pagmobilisa sa mga masa apang wala sang katumbas nga pagtukod sang solido nga kusog sang masa paagi sa pagtukod sang mga nagkalain-lain nga mga sandigan nga organisasyon masa sang mga mangunguma, mamumugon sa uma, kababainhan, pamatan-on, mga bata, grupong pangkultura, mangingsida kag iban pa.

Gani, ang mga kampanyang masa makapadasi sa pag-ani sang pinakamaayo nga mga rekrut para sa Partido kag NPA. Paagi sini makapatuhaw sang mga bag-o nga mga masang aktibista kag lider kag mapaaktibo liwat ang mga nagluya kag daan nga mga pwersa. Apang, dapat mangin mabinantayon sa pagbaton liwat pasulod sa rebolusyonaryong kubay sang mga nagpahuway kag nagsurender. Dapat mag-agi sa proseso sandig sa patakaran kag may maid-id nga pagpangusisa sang tagsa-tagsa ka sirkumstansya. Istrikto gihapon nga magbantay nga indi makapasulod sang bisan isa ka malain nga elemento nga mahimo “mata sang kaaway” sa sulod sang rebolusyonaryong hanay.

Dapat mapamunoan ang masa sa ila paghimakas sa tion sang naga-abot nga mga kalamidad kaangay sa paglupok sang bulkan Kanlaon kag padayon nga pag-alburuto sini, grabe nga tigilinit, *La Niña* kag iban pa. Dapat isentro ang pagpanukot sa reaksyonaryong gobyerno sang bulig kag subong man, ibuyagyag ang puno sang korapsyon, pagkamakinaugalingon kag pagka-inutil sa pag-agap sa mga masa sang rehimen US-Marcos II. Sa mas naga-igting nga inaway sang Marcos-Duterte, kinahanglan nga mapamunuan man ang masa sa ila paghulag sa kaangay nga pagpanukot sa pagpatumbaya ni Marcos Jr sa sandigan nga kinahanglanon kag kinamatarung

sang Negrosanon kag pumuluyong Pilipino samtang ginahimakasan man sang masa ang pagpatalsik sa pamilyang Duterte.

Dapat nga ilunsar man ang mga kampanya sa produksyon kag pagpataas sa produksyon. Pagpatukod sang mga sistema sang patubig kag iban nga pamaagi nga magpauswag sa produksyon. Diri mas matuhay sang masa ang kinalain sang NPA kag sang reaksyonaryong AFP, PNP kag mga para-militar nga grupo sa hambalanon sang matuod nga pagbulig sa masa. Paagi man sini amat-amat nga mapangibabawan sang masa ang kahadlok kag mag-opensiba tubtob nga mabutang sa dependsiba ang kaaway.

Ang madinalag-on nga kampanyang masa makahatag man sang kahigayunan nga makapalapad sa mga bag-o nga erya kag malabot ang mga erya nga indi pa kaya nga lab-oton sang NPA. Kinahanglan malabot sang mga yunit sang NPA ang mga erya sa higad haywey, higad suba, higad baybay, patag kag mga sentrong banwa agud atipanon ang masa. Ini ang kabahin sang hilikuton sa pagpreparar sang sonang gerilya.

Ang pagpatuman sang agraryong rebolusyon yabe man sa madasig nga pagkonsolida kag pagpalapad sa baseng masa. Samtang nagapalupok sang mga kontra-pyudal nga paghimakas kag iban pa nga mga kampanyang masa, segurohon nga upod sini ang pagtukod sang ila mga organisasyon nga naga-isa sang ila tingog kag kusog para pangapinan ang naabot nga kadalag-an upod sa NPA kag iban pa nga rebolusyonaryong pwersa.

Sa kabilugan, ang pagpatuman sang rebolusyonaryong hilikuton, dapat ginasanto ang pormasyon sang NPA sa ikasarang sang baseng



masa kag sa kinaiya kag hulag sang kaaway. Himuon nga kahublagan ang sekreto nga paghulag agud indi gilayon matublag ang pagrekober sa baseng masa kag ang hilikuton ekspansyon. Kon maayo nga mapatuman ang tatlo ka integradong hilikuton, asegurado nga mangin tuburan ini sang rebolusyonaryong kusog para sa pagsulong.

4. Isulong kag pabaskugon ang kontra-pyudal, kontra-pasista kag kontra-imperyalista nga kahublagan masa sa mga kaumahan kag kasyudaran sa isla sang Negros

Makahulusga nga maangkon ang pagpasulong sang rebolusyonaryong armadong paghimakas paagi sa mabaskog nga pagsulong sang rebolusyonaryo nga kahublagan masa. Dapat nga tutukan kag husto nga pamunuan sang Partido sa isla ang pagpabaskog sang kontra-pasista kag kontra-pyudal nga paghimakas masa sa kasyudaran kag mga sentrong-syudad kag banwa.

Wala gid ginapahigad sang Partido ang malahalon nga papel sang ligal nga demokratiko nga kahublagan sa kasyudaran sa pagpabaskog sang armadong paghimakas sa kaumahan. Dapat nga tukuron ang mga teritoryal nga komite sang Partido sa mga prenteng gerilya sa nagakaigo nga panahon. Paagi sini, mapabaskog ang mga mobilisasyon masa sandig sa mga dalagku nga isyu nga ila nga ginaatubang subong ilabi na ang pagpatuman sang neo-liberal nga polisiya diri sa isla sang Negros. Kinahanglan ang ululupod kag mabaskog nga pagpamatok sang pumuluyong Negrosanon sa gintuga nga kahalitan sini sa kabuhi kag palangabuhian sang pumuluyo.

Ginapalanog ang pagka-makatarunganon sang armadong paghimakas paagi sa hugot nga pag-angot sa mga isyu sang masa sa kasyudaran sa kontra-pyudal nga mga isyu sa kaumahan.

Kinahanglan ang dugang nga pagpapagsik sang mga hayag nga organisasyon masa kag tukuron ang malapad kag madalom nga likom nga mga organisasyon masa kag *network* sa pungsodnon tubtob internasyunal nga sakop. Lakip sa hilikuton sang kahublagan masa sa kasyudaran ang pagtukod sang pinakamalapad nga nagahiliugyon nga prente nga magtuga sang biak sa kubay sang nagahari nga sahi kag tay-ugon ang kaaway nga sahi sa ila kaugalingon nga mga balwarte.

Ang madamo nga rekrut sa NPA, ang dako man nga talaksan sang kadalagan sang kahublagan masa sa kasyudaran lakip na ang napatuhaw nga suporta lohistika kag materyal kag iban pa nga rekurso para sa armadong paghimakas.

Sa pagsulong sang kahublagan panadlong, dapat hugot nga uyatan sang tanan nga kadre kag rebolusyonaryong pwersa ang armadong paghimakas bilang nagapanguna nga porma sang paghimakas, samtang sekundaryo ang hayag nga kahublagan masa kag iban pa nga kinaiya sang paghimakas sa pagpatuman sang sentral nga katungdanan nga ibagsak ang neokolonyal nga estado sang mga burges komprador kag agalon may duta. Dapat palig-unon sang Partido ang kahandaon sa pag-uyat sang armas kag magpasakop sa armadong paghimakas.

Ang NPA ang nagahatag sang inspirasyon sa kahublagan masa sa kasyudaran. Dapat pursigido nga mag-amot ang mga rebolusyonaryong pwersa sa kasyudaran sa komprehensibo nga pagsulong sang armadong paghimakas sa kaumahan. Aton nga hawanon ang malapad nga dalan sa pagmartsa nga katumbas nga isip sang mga mamumugon, mala-proletaryado kag petiburges nga intelektwal halin sa kasyudaran bisan pa sa iban nga pungsod padulong sa banas sang armadong paghimakas. Kinahanglanon sang NPA ang mga kadre nga mamumugon kag intelektwal nga magserbe nga mga Pulang hangaway, kumander kag opisyal sa pulitika sang NPA, samtang nagapanglakaton sa dalan sang liwat nga pagsulong.

Sa subong, mas nagadalom pa ang suporta sang malapad nga masa sa rebolusyonaryong armadong paghimakas. Ang Partido kag ang NPA lamang ang matuod nga nagapanindugan sa interes kag kaayuhan sang pumuluyong Negrosanon kag sa bug-os nga pumuluyong Pilipino batok sa pagduso sang neoliberal nga polisiya kag programa sa isla kag sa kapid sini nga pagsingki sang terorismo sang reaksyonaryong estado.

Agud maangkon ini, kinahanglan nga tudobuylo nga palaparon kag pabaskugon ang kahublagan masa sa kasyudaran, isulong ang mga paghimakas masa, pabaskugon ang mga organisasyon masa lakip na ang likom nga organisasyon masa kag pataason ang rebolusyonaryong kamuklatan sang mga rebolusyonaryong pwersa sa kasyudaran.

Sa sini nga basehan, nagapakita nga ang demokratiko nga rebolusyon sang banwa paagi sa pangmalawigon nga inaway banwa ang isa ka makatarunganon nga gyera. Ang Partido kag NPA ang wala paghubas. Ang NPA ang isa ka hukbo nga indi malutos kag mapukan ni bisan sin-o kag bisan san-o man. Gani makatarunganon ang magrebolusyon agud angkunon ang matuod nga kahilwayan kag demokrasya.



*Isulong ang demokratikong interes kag
kaayuhan sang pumuluyong Negrosanon kag bug-os
nga katawhan Pilipino!*

*Tapuson ang terorismo sang reaksyonaryong estado
kag lab-uton ang hustisya sosyal!*

*Isulong ang demokratiko nga rebolusyon sang
banwa paagi sa pangmalawigon nga inaway banwa
sa mas mataas nga halintang!*

Mabuhay ang CPP-NPA-NDF!

*Mabuhay ang ika-56 nga Anibersaryo sang
New People's Army!*